

疑同異疑上品疑如名疑如名義疑此等諸
疑應當除斷若如是者即菩薩摩訶薩於一
切相悉無所觀以相無所觀故名亦無所觀
般若波羅蜜多亦無所觀諸行無所觀色無

所觀受想行識皆無所觀何以故色自性空

以離性故色體即空離色無別空空體即色

離空無別色是義云何名分別色舍利子當
知色法自性不生不滅非染非淨彼名自性
亦非緣法離諸疑惑無所從來亦無所住如
實所生離三際故色法如是受想行識亦復

如是是故菩薩摩訶薩於諸名相皆無所觀
以無所觀故而無所入無所入者即能圓滿
般若波羅蜜多相應勝行

佛說了義般若波羅蜜多經

佛說大方廣未曾有經善巧方便品

宋西竺三藏朝奉大夫鴻臚卿傳法大師施設奉詔譯

爾時有菩薩摩訶薩其名大意於衆會中即
從座起嚴整衣服合掌恭敬頂禮佛足前白
佛言世尊諸修菩薩行者於五欲境作何方

便取而不著雖復常行無所障礙爾時佛告
大意菩薩言善哉善哉大意汝名最上見最
上義能於衆中問如是事諸修菩薩行者未
來世中於諸佛所深種善根如是名爲善巧
方便即得諸佛共所建立是時大意菩薩復
第十四
白佛言世尊諸修菩薩行者未來世中云何
於諸佛所深種善根唯願世尊利樂一切衆
生廣爲宣說佛言善男子汝今諦聽當爲汝
說若有人行少分施能起增上廣爲一切衆
生最勝善心所獲功德迴向一切衆生如是

善利無有窮盡譬言如天雨降霖大海一一水
滴數不可知相續流注無有窮盡行布施者
善巧迴向一切衆生所有功德亦復如是資
諸善法展轉增勝亦復無盡乃至成佛衆善
圓滿復次大意若復有人見有曼拏羅處施
以一香作是施時當起是意普願一切衆生
得最上戒香具足一切樂具皆得如意若施
一華普願一切衆生當於天上人間平等受
大供養若施一燈普願一切衆生開諸盲目
消除黑暗得大明照如日月光若施塗香而

用塗飾普願一切衆生當得真金色福天香
塗飾若施衣服普願一切衆生慚愧具足離
諸過失若施搏食普願一切衆生得天甘露
食復得最上法甘露味快樂具足若施鈴鐸
普願一切衆生皆得最上清妙梵音聞者適
悅若施傘蓋普願一切衆生離風雨難得大
清涼普覆一切若施幢旛普願一切衆生身
如朗月清淨潔白光明普照盡諸世間人所
愛樂若施寶拂普願一切衆生離諸塵垢身
得清淨有大名稱最上吉祥所應具足若施

諸莊嚴具普願一切衆生當得一切佛功德
寶聖莊嚴具若施歌舞樂普願一切衆生得勝
耳根常聞諸佛妙好音聲若施船舫騎乘普
願一切衆生得最上乘又復隨諸衆生有所
愛樂而悉施與得童子相柔軟妙好受天快
樂諸所施作適悅自在若施栴檀香普願一
切衆生得三十二大丈夫相具足莊嚴乃至
無見頂相常出妙香若施座具普願一切衆
生受天富樂一一當處最上最勝大金剛座
若施卧具普願一切衆生當得最上歡喜適

悅若施僧坊舍普願一切衆生住天悅意
妙寶樓閣四種神足悉得圓具若施空地普
願一切衆生當得安住勝妙十地速至最上
圓滿佛地若施眷屬普願一切衆生當得世
間天人阿脩羅等常所侍衛堅固不壞最上
最勝諸所施作而無等比若施醫藥普願一
切衆生離諸病苦如大藥樹當得金剛不破
壞身一切莊嚴常得最上適悅快樂若施明
鏡普願一切衆生如月光明普照一切若施
瓶器普願一切衆生得大賢瓶灌注法水普

潤一切若施園林樹木普願一切衆生身如
劫樹若施酥酪普願一切衆生得最上樂味
若施甘美等物普願一切衆生得最上可愛
輕安樂味又復諸修菩薩行者若見一切男
女奴婢當起是意普願一切衆生悉當遠離
恩愛纏縛憂惱等苦一一皆獲自在快樂若
見苦境當起是意普願一切衆生得離諸苦
第十九
解脫自在與諸佛等若於一切衆生作父母
師長阿闍梨想恭敬尊重於當生中天上人
間若沙門婆羅門等諸所生處諸根調伏離

一切苦若處五欲樂時當起是意普願一切衆生如所樂欲悉得如意一切皆具菩薩勝行若澡沐時當起是意普願一切衆生離諸塵垢清淨無染與諸佛等若入園林寺舍及諸方處當起是意普願一切衆生得入最上解脫法門若出一切刀處當起是意普願一切衆生出輪迴際住安樂法若飲食時當起是意普願一切衆生離諸惡趣斷飲食想若處眷屬中當起是意普願一切衆生遠離鬪諍互相愛敬為善知識慈和平等若開戶時

當起是意普願一切衆生開解脫門咸得趣入若閉戶時普願一切衆生閉惡趣門不復趣進若履道路時當起是意普願一切衆生如理修行順趣正道若乘船舫騎乘當起是意普願一切衆生乘最上乘登正覺道若有所過度時當起是意普願一切衆生出過地獄等苦不復趣入若有一切常語論時當起是意普願一切衆生正念現前諸法圓滿若見有人起忿怒時即生歡喜作如是意普願一切衆生當息一切毒害忿怒遠離魔境若

有宣說善法語言當起是意普願一切衆生
得諸佛智辯才無礙若處戲笑歌舞讚詠當
起是意普願一切衆生常大歡喜受諸富樂
自在適悅若睡眠時當起是意普願一切衆
生起最上心出離無智塵暗淤泥諸有所作
得佛建立住圓滿智若經行時當起是意普
願一切衆生常得履諸聖道爾時大意菩薩
聞說是法生大歡喜復白佛言善哉世尊善
說此法能令一切修菩薩行者所有身語意
業如善所作常得諸佛共所攝受所有惡趣

一切衆生得佛教度世尊於後末世修菩薩
行者如佛所說善巧方便應如是行是即名
爲修菩薩行佛言大意如是如是諸修菩薩
行者若如是學即得信心堅固不復退轉種
子具足出生現行大意當知此即名爲菩薩
勝相復爲最上善巧方便汝等於此正法當
勤修習爲人演說爾時大意菩薩摩訶薩聞
佛說是法已歡喜稱讚禮世尊足退住一面

佛說大方廣未曾有經善巧方便品

永樂北藏

五經同卷

第七一冊